

ÁREA DE EDUCACIÓN, CULTURA E MEMORIA HISTÓRICA SERVIZO DE CULTURA RVS	Documento CI114I01O5	
Código de verificación  3V6J 5N6O 6G44 306O 12O5	Expediente CI1/2020/252 Fecha 23-07-2020	

CONVOCATORIA ESPECÍFICA PARA A CONCESIÓN DE AXUDAS DERIVADAS DO PROGRAMA “BONO CULTURA” PARA O EXERCICIO 2020 NO MARCO DO PLAN DE REACTIVACIÓN ECONÓMICA E SOCIAL DA CORUÑA (PRESCO) POR CAUSA DA COVID-19

LIMIAR

O modificativo M2 aprobado no Pleno do Concello da Coruña, o pasado 1 de xuño por unanimidade de toda a Corporación, dispuxo a dotación orzamentaria precisa de 13.276.416,2 € para realizar o Plan de reactivación económica e social da Coruña (PRESCO) que, tal e como reflicte a Memoria da Alcaldía dese expediente implica a “realización de gastos específicos e determinados cuxa efectividade non se considera posible demorar ata o próximo exercicio, ante a emerxencia social e económica ocasionada pola pandemia da COVID- 19 e as medidas de contención tomadas para combatela”.

O M2 implica unha reorientación orzamentaria para poder sufragar medidas “dirixidas a mitigar o duro impacto económico derivado da crise sanitaria” cos seguintes obxectivos:

- Proporcionar recursos para contribuír ao mantemento do tecido socioeconómico desta cidade e para a atención das persoas con máis dificultades sociais.
- Mellorar os servizos públicos municipais para facer fronte á pandemia e ofrecer unha atención cidadá segura.
- Facer fronte ás consecuencias sociais e económicas da pandemia coa maior axilidade posible.

Para conseguir estes obxectivos, o plan estrutúrase en tres grandes eixos socioeconómicos externos e un interno, cada un con diversas liñas de traballo. Así, o eixo económico 3 contempla “medidas económicas para colectivos afectados polo cesamento da actividade económica por causa da COVID-19 (autónomos, micropremes, comercio, hostalería e industria cultural)”.

Unha das medidas dese eixo é a implantación dun “Bono Cultura” cunha dotación de 370.000 € cuxa finalidade é a de incentivar e fomentar na cidadanía coruñesa o consumo de bens, produtos e servizos culturais. O programa articulase de xeito que a veciñanza consumidora de produtos ou servizos culturais en establecementos (físicos ou virtuais), ou ben, directamente, de prestadores adheridos ao programa, poida obter bonos con valor económico para poderen ser aplicados nos sucesivos consumos de produtos ou servizos culturais na cidade nun período temporal concreto.

Para a xestión e canalización destas axudas contarase coa Fundación Emalcsa como entidade colaboradora ao abeiro do establecido no artigo 12 da Lei 38/2003, do 17 de novembro, xeral de subvencións e restantes disposicións de xeral e de concordante aplicación.

En consecuencia, de acordo cos obxectivos sinalados e de conformidade coas competencias atribuídas a este concello polo artigo 25 da Lei 7/1985, do 2 de abril, reguladora das bases do

réxime local (nomeadamente en canto á promoción da cultura) e en aplicación do artigo 23 da Lei 38/2003, do 17 de novembro, xeral de subvencións (LXS), así como das normas de carácter regulamentario que a desenvolven (RD 887/2006, do 21 de xullo), e da Ordenanza xeral de subvencións da Área de Benestar (BOP do 19 de febreiro de 2005), convócanse para o exercicio 2020 as axudas derivadas do programa “Bono Cultura” no marco do PRESCO e axústanse, en todo caso, aos principios de publicidade, transparencia, concorrència, obxectividade, igualdade e non discriminación e de acordo coas seguintes CLÁUSULAS:

1. FINALIDADE

O programa “Bono Cultura” do Concello da Coruña é un programa no marco do Plan de reactivación económica e social por causa da COVID-19 (PRESCO) cuxa finalidade é a de dinamizar e apoiar o sector cultural da cidade incentivando a compra de produtos ou servizos culturais por parte da cidadanía e que neste exercicio 2020 está dirixido a mitigar, en parte, os efectos económicos derivados da situación provocada pola COVID-19.

2. OBXECTO

Para incentivar o consumo de produtos e servizos culturais por parte da cidadanía, o programa “Bono Cultura” do Concello da Coruña ten por obxecto subvencionar a compra ou o consumo de bens, produtos e servizos culturais por parte da cidadanía coruñesa maior de 14 anos, por medio da obtención dun “bono” cuxo valor económico será do 40% da base impositible do prezo a satisfacer polo produto ou servizo cultural consumido, en establecementos físicos, ou tamén a prestadores de servizos culturais adheridos á campaña 2020 e durante un período temporal concreto. Os bonos poden ser trocados posteriormente en novas compras e consumos de produtos ou servizos culturais, ata o seu esgotamento.

3. INSTRUMENTACIÓN TÉCNICA DO “BONO CULTURA” E DURACIÓN DO PROGRAMA

1. Os titulares dos establecementos e prestadores de bens e servizos culturais interesados en participar no programa “Bono Cultura” deberán rexistrarse nunha páxina web facilitando o seu NIF ou CIF, segundo corresponda, así como un código postal e aceptar a declaración responsable do cumprimento dos requisitos esixidos no artigo 13 da Lei 38/2003, do 17 de novembro, xeral de subvencións e a súa normativa de desenvolvemento, debendo comprobar e validar a entidade colaboradora ou, subsidiariamente o Concello da Coruña, que as persoas físicas ou xurídicas adheridas ao programa están ao corrente no cumprimento das obrigas tributarias, coa Seguridade Social e que non teñen pendente de xustificación en subvencións prepagables nin de reintegro ningunha subvención co Concello da Coruña. Esta comprobación poderá efectuarse con ocasión da adhesión ao programa ou ben ao efectuar o primeiro aboamento polos descontos practicados a cargo dos “bono cultura”, baixo a responsabilidade do titular do establecemento de non acadar a condición de beneficiario e non poder percibir o importe dos bonos aplicados.

De conformidade co artigo 28.2 da Lei 30/2015, do 1 de outubro, de procedemento administrativo común das administracións públicas, o Concello de Coruña solicitará as certificacións que deban emitir a Axencia Estatal de Administración Tributaria, a Tesourería Xeral da Seguridade Social, a Axencia Tributaria de Galicia e o propio Concello da Coruña, para verificar o cumprimento deste apartado.

Unha vez dados de alta na web, os suxeitos prestadores de bens e servizos culturais adheridos ao programa “Bono Cultura” deberán descargar unha aplicación móbil subministrada polo concello e radicada nas app store máis habituais do mercado, que rexistrará as vendas aboadas cos bonos facilitados aos consumidores de produtos e servizos culturais, facilitando a contabilización dos trocos dos bonos mediante a lectura dos códigos QR que levarán os bonos.

A descarga da app suporá a aceptación das condicións de uso da app e a política de protección de datos segundo a Lei orgánica 3/2018, do 5 de decembro, de protección de datos persoais e garantía de dereitos dixitais.

2. Os consumidores de produtos culturais deberán ser maiores de idade ou maiores de 14 anos que cumpran co preceptuado no artigo 7 da Lei orgánica 3/2018 de 5 de decembro, de protección de datos e garantía de dereitos dixitais e de acordo co artigo 1.263 do código civil, debendo rexistarse nunha web habilitada polo concello, facilitando a identidade persoal, un código postal, un enderezo electrónico e un número de teléfono móbil ao que se poderá chamar aos efectos de comprobar a trazabilidade das operacións e bonos aplicados.

A alta suporá o envío, ao seu número de móbil de contacto e/ou ao correo electrónico facilitado, do “Bono Cultura”, que servirá como medio de pago por persoa do 40% da base imponible dos bens ou produtos culturais consumidos nos establecementos adheridos á campaña. O 40% do gasto bonificado coa presentación do bono non superará os 60 euros sobre a base imponible do/s produto/s ou servizo/s consumidos e será necesario un gasto mínimo, igual ou maior de 10 euros (ive incluído) antes da aplicación do desconto na base imponible, para poder presentar o Bono Cultura por cada compra. As persoas titulares de establecementos e suxeitos prestadores de bens e servizos culturais, devengarán o imposto do valor engadido (ive) polo prezo total, sen o desconto, de cada produto ou servizo consumido que será aboado íntegramente polo consumidor.

Poderán facerse sucesivos consumos de produtos, bens e servizos culturais ata chegar a consumir os 60 euros que leva aparelado o “Bono Cultura”. En caso de que o crédito orzamentario total da campaña se esgote antes de que os usuarios consuman os seus bonos non poderán esixir a súa eficacia ante as persoas titulares de establecementos ou suxeitos prestadores de servizos culturais. Para iso, a aplicación móbil (tecnolóxica) advertirá, aos participantes na campaña, do esgotamento dos fondos.

3. Os consumidores cando merquen ou contraten produtos culturais nos establecementos da cidade da Coruña adheridos á campaña ou ante os suxeitos prestadores de servizos culturais presentarán ao pagamento o Bono Cultura que recibiron por correo electrónico e/ou no seu teléfono móbil. O dito bono levará un código QR que o lector móbil (técnolóxico) de cada persoa titular de establecemento ou suxeito prestador, recoñecerá como medio de pago do 40% da base imponible do produto ou ben adquirido ou contratado, nos límites do parágrafo anterior.

4. As persoas titulares de establecementos, así como os suxeitos prestadores de servizos culturais, adheridos á campaña poderán, quincenalmente, trocar os pagamentos recibidos mediante bonos e rexistrados na aplicación móbil (tecnolóxica) da campaña, polas cantidades líquidas correspondentes presentando a documentación requirida nesta convocatoria ante a entidade colaboradora, a Fundación EMALCSA, que se encargará de verificar a efectividade dos bonos, coa documentación xustificativa indicada neste mesmo condicionado, e entregaralles os correspondentes importes aos establecementos e prestadores de bens e servizos culturais, do programa “Bono Cultura”.

5. Os bonos son persoais e intransferibles, e poderán obterse desde o mes de agosto ata o 30 de novembro de 2020 ou ben ata que se esgote o crédito orzamentario destinado á campaña.

6. Os bonos terán unha validez de dous meses desde a súa expedición e caducarán, en todo caso, o 30 de novembro de 2020, aínda que fosen expedidos con menos de dous meses de antelación.

7. Os bonos consumidos deberán ser trocados e aboados pola entidade colaboradora, logo da previa xustificación das prestacións (ventas ou actividades realizadas), nos termos fixados

nesta convocatoria ata un límite de 5.000 € por establecemento ou prestador de bens e servizos culturais. A fin de evitar que se supere o saldo máximo de financiamento dedicado ao bono cultura, aplicarse a determinación contida no último parágrafo do apartado 3.2 precedente, advertindo de tal circunstancia a aplicación móbil as persoas adheridas a esta campaña.

Os bonos non consumidos polos usuarios non terán valor efectivo e polo tanto non se poderán trocar por cartos.

8. A aplicación móbil da campaña permitirá que, as persoas titulares de establecementos e os prestadores de bens e servizos culturais, poidan ter un seguimento en tempo real dos bonos trocados; a entidade canalizadora destas axudas tamén poderá acceder a toda a información en tempo real sobre os movementos dos establecementos e sobre o número de bonos trocados por cada establecemento a través dunha páxina web.

Ademais establecerase un sistema de seguridade polo que se cruzarán os datos do DNI do usuario e o móbil para garantir que cada persoa só poida acceder aos bonos unha vez e anular os bonos cando cheguen ao máximo de bonificación establecido (60 euros)

4. ENTIDADE COLABORADORA

A xestión do proceso derivado destas axudas levaraa a cabo a Fundación EMALCSA, quen actuará por nome e conta do Concello da Coruña na xestión e desenvolvemento do programa e ostentará a condición de entidade colaboradora coas funcións previstas no artigo 12 da Lei xeral de subvencións e as que se concreten no correspondente convenio de colaboración que asinará co Concello da Coruña.

A Fundación EMALCSA disporá de acceso a unha páxina web vencellada á app móbil sinalada na cláusula anterior que dará soporte e coñecemento tanto do troco de bonos como dos pagamentos polos produtos e servizos culturais consumidos, facendo así o seguimento dos bonos culturais empregados polas persoas consumidoras, e rexistrados ante os suxeitos prestadores de servizos propios da industria e actividades culturais (adheridos ao sistema) que percibirán os importes dos bonos utilizados en cadanseus produtos e actividades culturais.

5. CRÉDITO ORZAMENTARIO

1. O importe económico destinado directamente aos “Bono Cultura” para o exercicio 2020 é de 355.000 euros, gasto imputable á aplicación orzamentaria 50.334.489.50 do Orzamento Municipal en vigor. A aplicación contempla este importe cuxa aplicación se executa a través da Fundación EMALCSA, en canto que entidade colaboradora encargada da xestión e desenvolvemento do programa mediante pagos parciais e/ou totais á esta entidade colaboradora, consonte coas condicións e requisitos que figuran no convenio de colaboración para asinar por esta, co Concello da Coruña.

Este crédito orzamentario é o límite do importe das axudas que se poden conceder.

2. De conformidade co disposto no artigo 58.2 do Regulamento xeral de subvencións (RD 887/2006, do 21 de xullo), no caso de que este crédito fose incrementado como consecuencia dunha modificación orzamentaria, como consecuencia dunha xeración, ampliación ou incorporación de crédito, esta contía adicional poderá aplicarse á concesión de axudas sen necesidade dunha nova convocatoria. A efectividade da contía adicional queda condicionada á declaración da dispoñibilidade de crédito.

6. NATUREZA DAS AXUDAS E COMPATIBILIDADE

As axudas que se concedan no marco do programa “Bono Cultura” terán a consideración de subvencións ao consumo de produtos e servizos culturais.

Esas axudas son compatibles con outras axudas ou subvencións de entidades públicas e privadas para idéntico fin, agás coas axudas derivadas dos programas municipais “Bono 10 Comercio” e “Bono 5 Hostalería” aos que non poderán adherirse os establecementos culturais adheridos ao presente programa “Bono Cultura”.

7. PERSOAS FÍSICAS E XURÍDICAS BENEFICIARIAS

1. Consideraranse persoas beneficiarias destas axudas as persoas físicas ou xurídicas titulares dos establecementos físicos ou virtuais, así como prestadoras de servizos culturais, que se adhiran ao programa “Bono Cultura” promovido polo Concello da Coruña, e que cumpran os seguintes requisitos:

A) As persoas físicas traballadoras autónomas deberán estar dadas de alta no réxime especial de traballadores autónomos (RETA), ou en calquera outro réxime especial por conta propia da Seguridade Social, ou en mutualidade de colexio profesional vencellado á actividade cultural, así como estar en situación de alta no termo municipal da Coruña nalgún destes epígrafes do IAE:

- Epígrafe 476.1, edición de libros.
- Epígrafe 476.2, edición de periódicos e revistas.
- Grupo 657 Comercio polo miúdo de instrumentos musicais en xeral, así como dos seus accesorios
- Epígrafe 659.1 Comercio polo miúdo de selos, moedas, medallas conmemorativas, billetes para coleccionistas, obras de arte e antigüidades, minerais soltos ou en coleccións, fósiles, insectos, cunchas, plantas e animais desecados.
- Epígrafe 659.4 Comercio polo miúdo de libros.
- Epígrafe 961.2 Doblaje, sincronización y montaje de películas o cintas cinematográficas (incluso vídeos) siempre que no se efectúe por la propia empresa productora
- Epígrafe 961.1 Producción de películas cinematográficas (incluso vídeos).
- Epígrafe 961.3 Decoraciones escénicas para películas o cintas cinematográficas siempre que no se efectúe por la empresa productora.
- Epígrafe 962.1 Distribución e venda de películas cinematográficas.
- Epígrafe 963.1 Exhibición de películas e vídeos.
- Epígrafe 963.1 Exhibición de películas e vídeos ao aire libre.
- Epígrafe 963.1 Exhibición de películas e vídeos fóra de establecemento permanente.
- Epígrafe 965.1 Espectáculos en salas e locais.
- Epígrafe 965.2 Espectáculos en salas e locais ao aire libre.
- Epígrafe 965.3 Espectáculos en salas e locais fóra de establecemento permanente.
- Epígrafe 965.4 Empresas de espectáculos.
- Epígrafe 966.1 Bibliotecas e museos.
- Epígrafe 966.9 Outros servizos culturais N.C.O.P.
- Epígrafe 969.1 Salas de baile e discotecas.

- Epígrafe 973.1 Servizos fotográficos.
- Grupo 983 Axencias de colocación de artistas.
- Epígrafe 989.1 Expedición de billetes de espectáculos públicos.
- Grupo 865 Representantes técnicos do espectáculo.
- Grupo 853 Axentes de colocación de artistas.
- Grupo 861 Persoas pintoras, escultoras, ceramistas, artesás, gravadoras e artistas similares.
- Grupo 862 Restauradoras de obras de arte.
- Grupo 882 Guías de turismo.
- Grupo 883 Guías e intérpretes de turismo.
- Grupo 013 Actores/actrices de cinema e teatro.
- Grupo 014 Extras especializados, dobres, comparsas e meritorios.
- Grupo 016 Humoristas, caricatos, excéntricos-as, charlistas, recitadores-as, ilusionistas etc.
- Grupo 018 Artistas de circo.
- Grupo 019 Outras actividades relacionadas co cinema, o teatro, o circo non comprendidas noutras partes -N.C.O.P.-
- Grupo 022 Bailaríns e bailarinas.
- Grupo 029 Outras actividades relacionadas co baile N.C.O.P.
- Grupo 031 Mestres-as e directores-as de música.
- Grupo 032 Intérpretes de instrumentos musicais.
- Grupo 033 Cantantes.
- Grupo 039 Outras actividades relacionadas coa música N.C.O.P.

B) As sociedades de calquera clase do ámbito cultural que teñan a condición de microempresa incluíndo as sociedades civís, comunidades de bens ou calquera outro tipo de unidade económica ou patrimonio separados sen personalidade xurídica, legalmente constituídas. En caso de comunidades de bens, sociedades civís ou outras entidades económicas sen personalidade xurídica deberá nomearse unha persoa representante apoderada, con poder bastante para cumprir os deberes que lle corresponden á agrupación ou comunidade de bens, dada de alta no censo de actividades económicas no termo municipal da Coruña nalgún destes epígrafes do IAE sinalados na letra a) anterior.

Para a definición de microempresas e pequenas empresas terase en conta o establecido no Anexo I do Regulamento (UE) núm. 651/2014 da Comisión, do 17 de xuño de 2014, así como a definición contida no Real decreto 1515/2007, do 16 de novembro, polo que se aproba o Plan xeral de contabilidade de pequenas e medianas empresas e os criterios contables específicos para microempresas.

Estes criterios entenderanse cumpridos por empresas que durante dous últimos exercicios consecutivos pechados reúnan, polo menos, dúas das seguintes circunstancias:

- Que o total das partidas do activo non supere o millón de euros.
- Que o importe neto da súa cifra anual de negocios non supere os dous millóns de euros.
- Que o número medio de persoas traballadoras empregadas durante o exercicio non sexa superior a dez.

C) Poderá participar calquera empresa con establecemento permanente no termo municipal de A Coruña.

En caso de que para o exercicio da actividade non se dispoña de establecemento permanente, que o seu domicilio fiscal estea dentro do termo municipal de A Coruña.

As salas de cine do municipio de A Coruña, poderán participar na campaña do BONO CULTURA, pola súa importancia no sector cultural, aínda que non cumpran os requisitos sinalados na letra A) e B) anteriores.

As persoas beneficiarias quedarán sometidas ás actuacións de comprobación por parte da Intervención do Concello da Coruña, segundo o establecido no título III da Lei 38/2003(LXS) ou ben do Consello de Contas ou Tribunal de Contas, segundo a súa normativa de aplicación; así como aos sistemas de auditoría que implemente a administración municipal para o seguemento e execución deste programa.

2. O incumprimento das obrigas contidas nas cláusulas desta convocatoria e demais normativa de aplicación dará lugar á obriga de devolver total ou parcialmente as axudas percibidas, así como os xuros de demora correspondentes, nos supostos previstos no artigo 37 da Lei 38/2003 (LXS) e a súa normativa de desenvolvemento.

3. Para facer efectiva a devolución a que se refire o punto anterior, tramitarase o oportuno procedemento de reintegro, que se axustará ao previsto no título II da Lei 38/2003 (LXS).

4. Ás persoas beneficiarias das axudas desta convocatoria seralles de aplicación o réxime de infraccións e sancións previsto no título IV da Lei 38/2003 (LXS).

8. OBXECTO DO PROGRAMA “BONO CULTURA”

Os bonos resultantes deste programa “Bono Cultura” servirán como medio de pagamento para mercar os produtos, bens e servizos culturais, enumerados con carácter excluínte e taxado:

- Libros con contido literario e artístico, ensaio, poesía, novela gráfica, cómic e ilustración e catálogos, así como os xornais e revistas culturais e de divulgación científica, incluso a suscripción destas por períodos equivalentes a duración do programa. Non terán carácter subvencionable os produtos de papelería, libros de texto, profesional e de estudo e consumibles informáticos.

- Xogos educativos e videoxogos.

- Música en formato CD e películas cinematográficas en DVD e Blue Ray

- Entradas ás salas de cine

- Adquisicións en galerías de arte

- Entradas para asistir á exhibición dos espectáculos en vivo teatrais, musicais ou calquera outro espectáculo escénico que se represente en espazos pertencentes a establecementos adheridos á convocatoria, con independencia da súa titularidade pública ou privada.

– Contratación de espectáculos realizados e prestados por persoas autónomas ou empresas sempre que estean adheridas ao programa, de natureza cultural, incluídos servizos audiovisuais, a consumidores, tanto que se presten en celebracións ou eventos privados ou públicos.

O “Bono Cultura” só será válido nos establecementos e actividades de prestadores adheridos ao programa.

Os produtos que se adquiran a través do “Bono Cultura” poderán ser trocados, se a persoa titular do establecemento, ou ben o suxeito prestador o autoriza, por un produto de prezo igual ou superior, e aboará a diferenza a persoa consumidora e titular do bono, pero en ningún caso se poderá solicitar a devolución do valor do bono en cartos en efectivo.

9. OBRIGAS DOS PRESTADORES DE BENS E SERVIZOS CULTURAIS ADHERIDOS

Os prestadores de bens e servizos culturais adheridos á campaña “Bono Cultura” adquirirán as seguintes obrigas:

a) Aceptar o bono Cultura como medio de pago, dos produtos culturais subvencionados, dun 40% sobre a base impoñible dos produtos que supoñan un mínimo de gasto igual ou maior de 10 euros (ive incluído) antes da aplicación do desconto na base impoñible.

b) Comprometerse a recibir e colocar os materiais publicitarios e identificadores do programa, nun lugar visible do establecemento durante a vixencia da campaña e informar de xeito gratuito as e os beneficiarios.

c) Dispoñer de teléfono móbil coa aplicación do programa “Bono Cultura” descargada e dada de alta na aplicación e dispoñer de lector QR nel.

d) Relacionarse coa entidade colaboradora para verificar o funcionamento da aplicación e os consumos de bonos coa súa correspondente xustificación documental co fin de recibir as liquidacións correspondentes.

e) Deberá presentar as facturas de venta ou servizos correspondentes, onde detallarán, ademais dos requisitos fiscais, a identificación do destinatario que será o poseedor do bono, o concepto de cada prestación e/ou servizo, o desconto aplicado ao prezo sen iva, e o iva desglosado; coa precisión de que o IVE deberá ser aboado íntegramente polo consumidor.

f) O emprego dos bonos cultura son compatibles con cantos outros descontos, ofertas ou vantaxes se apliquen por parte dos establecementos por aplicación doutros plans, programas, acontecementos ou calquera outro motivo.

g) A adhesión ao programa “Bono Cultura” exclúe a posibilidade de adhesión aos programas “Bono 10 Comercio” e “Bono 5 Hostalería”.

h) O prazo para darse de alta como suxeitos prestadores de bens e servizos culturais, adheridos ao programa “Bono Cultura” comezará, como sistema de concorrencia non competitiva, desde as 00.00 horas do día seguinte á publicación do extracto da convocatoria no BOP e ata o 30 de novembro ou esgotamento do crédito dedicado a este programa e sempre co límite máximo de 5000€ por suxeito beneficiario do programa ou inferior en caso de esgotar o crédito orzamentario total, contralado a través de cada CIF ou NIF, segundo corresponda, a través da aplicación móbil (tecnolóxica).

i) Facer constar explicitamente no establecemento adherido ao programa no que se merquen ou consuman produtos ou servizos culturais a imaxe do programa “Bono Cultura” que poderá ser descargada da páxina web do Concello, na pestana específica do programa. A imaxe mínima que figurará en lugar visible será un cartel A3 co logotipo do programa.

j) Utilizar no exercicio das actividades culturais que se presten unha linguaxe non sexista, unha comunicación inclusiva e non empregar a imaxe das mulleres como reclamo e con connotacións de tipo sexual ou denigrante, segundo o que dispón o Decreto legislativo 2/2015, do 12 de febreiro, polo que se aproba o texto refundido das disposicións legais da Comunidade Autónoma de Galicia sobre igualdade e a Ordenanza de igualdade e diversidade do Concello da Coruña.

k) Manter prezos de mercado dos produtos que ordinariamente viña ofertando nos seus establecementos suxeitos ao programa Bono Cultura ou polos servizos prestados. A alteración de prezos detectada, sen motivos debidamente xustificadas, que supoña un incremento do prezo por riba do mercado dos produtos e servizos culturais, obxecto do programa, determinará a exclusión do programa “bono cultura” por quen incumpra dita obriga, sen prexuízo das obrigas de reintegro e da apertura do procedemento sancionador correspondente, conforme a lexislación xeral de subvencións.

l) Acreditar que se cumpren todas as condicións para ser beneficiaria do programa, incluída a condición de microempresa, nos termos da cláusula 7.1 letra B).

j) Aportar os certificados de estar ao corrente das obrigas tributarias, coa seguridade social e non ter pendente de xustificación subvencións anteriores prepagables nin de reintegro ningunha subvención con este Concello, nos termos do artigo 13 da Lei xeral de subvencións e normativa de concordante aplicación.

K) Os demais deberes impostos pola Ordenanza xeral de subvencións da Área de Benestar do Concello da Coruña, pola Lei xeral de subvencións e polas demais normas reguladoras da materia.

10. PROCEDEMENTO DE LIQUIDACIÓN DOS BONOS RECIBIDOS E CONSUMIDOS POR PARTE DAS PERSOAS E ESTABLECEMENTOS ADHERIDOS Á CAMPAÑA

1. A liquidación das cantidades por troco de bonos consumidos será efectuada cunha periodicidade quincenal. Para isto, os suxeitos prestadores de bens, produtos e servizos culturais, emitiránlle unha liquidación á entidade colaboradora e achegarán a correspondente factura que detallará as operacións realizadas con desglose dos importes efectivamente abonados e os descontos obtidos pola presentación dos bonos.

A entidade colaboradora (Fundación EMALCSA) ingresará as cantidades resultantes no número de conta facilitado por cada suxeito prestador de bens e servizos culturais, adheridos ao programa, previa xustificación documental coas facturas segundo o indicado nesta convocatoria.

Para facilitar os pagos o Concello da Coruña poderá facerlle anticipos das cantidades á entidade colaboradora segundo reflicta o convenio que se asine por ambas as partes.

2. Estes pagamentos realizaranse ata o remate da campaña, liquidando todas as cantidades correspondentes aos gastos equivalentes aos bonos consumidos durante a vixencia do programa.

3. Documentación que deben presentar as persoas físicas ou xurídicas beneficiarias adheridas ao programa “Bono Cultura”:

- Deberá presentar a factura de venda do produto cultural, prestación do servizo, segundo proceda en cada caso, na que se detallará, ademais dos requisitos fiscais, establecidos pola normativa sobre facturación, o consumidor do produto ou servizo, que será o poseedor do bono, o concepto da prestación realizada, o desconto aplicado ao prezo sen iva; así como o IVE desglosado, debendo ser aboado o IVE, íntegramente, polo consumidor.

- As ditas facturas deberán ser verificables cos bonos e consumidos, cotexados e cadrados coa información de seguimento e trazabilidade que reportará a aplicación tecnolóxica implantada para a instrumentación técnica do bono.

4. A entidade colaboradora, sen prexuízo das facultades da administración municipal, coas asistencia técnicas requiridas, comprobará o cumprimento das obrigas das entidades beneficiarias previstas na cláusula 7, 8 e 9 precedente e nesta mesma.

5. A documentación que debe presentar a entidade colaboradora ante o concello que implanta esta liña de axudas determínase no convenio de colaboración.

11. INSPECCIÓN E INCUMPRIMENTOS

O Concello da Coruña, como responsable do programa, resérvase o dereito de realizar cantas comprobacións, inspeccións e demais medidas de control considere oportunas para velar pola correcta aplicación dos recursos públicos e verificar o correcto desenvolvemento do presente programa de axudas, servéndose dos mecanismos e medios de axuda para o seguimento E control dos programas PRESCO.

Así mesmo, o presente programa queda suxeito ás actuacións de comprobación da Intervención municipal mediante control financeiro e auditorías e do Concello da Coruña e/ou do Consello de Contas, conforme á súa normativa.

No suposto de que se operase algún incumprimento das obrigas establecidas na presente convocatoria por parte dos establecementos adheridos, o Concello da Coruña poderá cancelar a adhesión dalgún establecemento á campaña bono e comunicarlle tal circunstancia á entidade colaboradora, co fin de impedir o uso do bono.

12. PROTECCIÓN DE DATOS DE CARÁCTER PERSOAL

De conformidade coa Lei orgánica 3/2018, do 5 de decembro, de protección de datos de carácter persoal e garantía dos dereitos dixitais (LOPDGDD), os datos persoais recollidos na tramitación desta convocatoria de subvencións, cuxo tratamento e publicación autorizan as persoas interesadas mediante a descarga da app municipal do programa, serán incluídos nun ficheiro cuxo obxecto é xestionar o presente programa, así como para informar as persoas interesadas sobre o seu desenvolvemento, e será o órgano responsable del o Concello da Coruña.

As persoas interesadas poderán exercer os seus dereitos de acceso, rectificación, supresión, oposición, limitación ao tratamento e portabilidade dos datos rexistrados neste ficheiro mediante unha comunicación por escrito dirixida ao Rexistro Xeral do Concello da Coruña, situado na praza de María Pita, 1. 15001 A Coruña, coa seguinte referencia na súa carta: "LOPDGDD Exercicio de dereitos" (xunto coa súa solicitude escrita e asinada deberá acreditar a súa personalidade achegando a fotocopia do DNI). Tamén o poderá facer a través da sede electrónica do Concello da Coruña: <https://sede.coruna.gob.es/>

13. PUBLICIDADE DAS SUBVENCIÓNS NO PORTAL DE TRANSPARENCIA

A convocatoria publicarase no Boletín Oficial da Provincia da Coruña, mediante o extracto que abrirá o prazo para adherirse ao programa "Bono Coruña", logo da previa remisión á Base de datos nacional de subvencións (BDNS), co contido previsto no artigo 20 da LXS e normativa de desenvolvemento.

De conformidade co artigo 8.1 c) da Lei 9/2013, do 9 de decembro, de transparencia, acceso á información pública e bo goberno, as axudas públicas concedidas ao abeiro deste programa publicaranse con indicación do seu importe e persoas beneficiarias no Portal de Transparencia do Concello da Coruña (<https://www.coruna.gal/transparencia>).

14. REVISIÓN DA CAMPAÑA

Durante o mes de setembro e ata o 20 de outubro, o Concello da Coruña estudará a implantación e evolución da campaña e poderá aumentar os límites por persoa e suxeito prestador ou mesmo introducir algunhas modificacións no sistema para o bo fin do programa “Bono Cultura” e acadar a finalidade de distribuír e consumir o importe destinado a esta liña cultural.

A Coruña, na data da sinatura dixital deste documento electrónico.

Convocatoria asinada por:

A técnica de apoio á dirección de Economía, Facenda e Réxime Interior

María Begoña López García

A xefa do Servizo de Cultura

María Teresa Somoza Quintero

O director de Economía, Facenda e Réxime Interior

Manuel Ángel Jove Losada

O concelleiro de Educación, Cultura e Memoria Histórica

Jesús Javier Celemín Santos

O concelleiro de Economía, Facenda e Réxime Interior

José Manuel Lage Tuñas